

Problema financiero laga atras



2

Migracion Ehecutivo

Lidernan di Aruba ta alehando

3

Subsidio na peligro

Pakico Aruba ta a punto di perde subsidio Europeo pa cuido

4

Polucion, sushedad y engañonan

E necesidad pa reforma structural

5



Payroll Pro
HRM

WWW.PAYROLLPROHRM.COM



WHY PAYROLL PRO BEATS THE REST

THE MOST TRUSTED, ALL-IN-ONE HRM & PAYROLL SOFTWARE

OFFICIAL DISTRIBUTOR

VCC REAL SOFTWARE
International NV REAL SUPPORT
www.vcc-int.com

+297 583-7072

Segun CAft

Gabinete Wever-Croes II a laga Aruba cu un problema financiero di 200 miyon Florin

E ex-gabinete Wever-Croes II lo a carga Aruba cu un debe extra estima na casi 200 miyon florin Arubiano. Esey ta resulta for di un raport confidencial di e College Aruba financieel toezicht (CAft), cu recientemente a bira publico despues di un splicacion di presidente di CAft, Lidewijde Ongerling, durante un reunion di e Comision di Eerste Kamer pa Relacionnan di Reino.

Ineficiencia den Financiamiento

E problema financiero ta relaciona cu e privatisacion di e instalacion di e planta di procesamiento di awa sushi na Bubali, RWZI. E maneho di e instalacion a wordo transferi for di Departamento di Obra Publico (DOW) pa un entidad gubernamental nobo: Aruba Wastewater Sustainable Solutions N.V. (AWSS), un subsidiario di Utilities Aruba N.V. Segun CAft, e structura di gobernacion aki, poni na distancia, ta hiba AWSS pa tuma fianstanan costoso for di e mercado liber, locual ta aumenta e gastonan considerablemente.

“Nos a calcula cu esaki ta trece un carga extra di casi 200 miyon florin,” Ongerling a bisa. Segun e, gobierno por a financia e proyecto mucho mas barata cu e presupuestonan existente. E ta yam’e “ineficiente” cu AWSS awor ta lidia cu gastonan halto di interes, cu finalmente lo cay riba e contribuyente Arubano via e presupuesto nacional.

Fuente Alternativo di Financiamiento y Preocupacionnan Constante

Ex-gabinete Wever-Croes II, sinembargo, a anuncia den pasado mecanismonan alternativo di financiamiento. AWSS lo a wordo co-financia desde 1 di juli 2024 via un asina yama Sustainability Fee di \$20 pa bishitante, cobra na turistanan no-residente cu ta yega via avion. E cobransa aki ta wordo colecta automaticamente via e sistema online di Embarkation and Disembarkation (ED) Card. E entradanan ta destina pa mehora infraestructura existente y pa construi un instalacion di procesamiento di awa sushi nobo.

Basa riba un promedio di 1 miyon turista pa aña, e Sustainability Fee aki lo por genera mas o menos 200 miyon florin den dies aña. Esaki ta asumiendo, sinembargo, cifranan di turismo constante y ningun excepcion – factornan cu den realidad por fluctua. Ademas, a wordo anuncia cu e impuesto ambiental cu turistanan ta paga via hotel lo wordo aumenta pa sostene e financiamiento mas aleu.

Aunke e fluho di entrada aki por contribui na cubri e gastonan na largo plaso, e preocupacionnan di CAft ta keda. E hecho cu AWSS



directamente ta tuma fiansa for di e mercado di capital ta crea gastonan di interes inmediato y structural, sin control parlamentario of transparencia publico.

Patronchi Mas Amplio den Politica Financiero

CAft a expresa preocupacionnan caba anteriormente tocante e maneho presupuestario di gabinete Wever-Croes.

Poco prome cu eleccion 2024, e gabinete a implementa un reduccion di impuesto repentino, sin aprobacion di parlamento. E medida aki a causa un deficit presupuestario structural di 50 miyon florin pa aña.

Principalmente gruponan di entrada mas halto a beneficia di esaki, mientras cu pensionadonan – hopi bou di e linea di pobreza – a ricibi solamente un subsidio mensual di 30 florin como compensacion.

Consideracion Final

E revelacionnan recien tocante e financiamiento di AWSS, segun criticonan, ta ilustra un tendencia mas amplio di maneho financiero opaco y decisionnan di politica cuestionabel. Aunke AWSS por wordo paga bek parcialmente via cobransanan di turista, e esencia di e consejo di CAft ta keda: e structura y financiamiento scogi ta ineficiente, costoso, y ta pone un presion innecesario riba e finansa di gobierno di Aruba.

Fuentenan:

CAft-rapport, Mei 2025

Reunion Comision Eerste Kamer pa Relacionnan di Reino

VisitAruba.com / Gobierno di Aruba

DossierKoninkrijksrelaties.nl

AWSS corporate information